

工部則例



工部則例

營繕清吏司

倉廩

一倉廩營建。順治初年定。京城八倉。通州三倉。凡倉。以五間為一廩。每間七檁。六椽。寬丈四尺。深五丈三尺。山柱高二丈二尺五寸。檐柱高丈五尺五寸。每廩頂各開氣樓一座。廩底甄砌。上鋪木板。廩門及墻下均開穴竇。以洩地氣。

京倉。祿米倉。共二十五廩。官廳三間。官舍七間。科房三間。井一。○南新倉。共三十廩。官廳一座。



官舍八間。科房四間。井一。○舊太倉。共四十二
廩。官廳三間。科房三間。井二。○海運倉。共三十
八廩。官廳三間。科房三間。井一。○北新倉。共四
十九廩。官廳三間。科房四間。井二。○富新倉。共
二十八廩。官廳三間。官舍八間。科房三間。井二。
○興平倉。共三十廩。官廳三間。科房二間。班房
一間。井一。○太平倉。共十有五廩。水門三道。官
廳三間。官舍四間。科房三間。○通倉。西倉。共一
百十有二廩。倉西門。官廳三間。後房一間。倉南
門。官廳三間。後房一間。井三。○中倉。共六十四

廩。倉南門。官廳三間。倉東門。官廳三間。倉北門。
官廳三間。科房三間。井一。○南倉。共四十五廩。
倉東門。官廳三間。倉北門。官廳三間。官舍六間。
科房一間。井一。乾隆十八年奏裁。○石壩。號房五十六
間。大通橋。盤糧廳三間。號房六十四間。朝陽門
外。號房二十八間。

一倉廩。增建。順治十七年覆準。各倉場基。園基。
均用甄鋪砌。○康熙六年題準。增設京倉廩房。
由部確估。移咨戶部。轉行倉場。動支通濟庫輕
齎銀。如不足用。戶部補給。○二十二年題準。增

造海運。祿米等倉。八十一廩。○三十二年題準。舊太。南新等六倉。增三十六廩。通倉。增十廩。○四十一年題準。通州。增建看守三倉。官房四十間。兵房二百四十間。○四十二年題準。富新。太平等倉。增四十一廩。通倉。增二十四廩。○四十四年議準。太平倉廩。歸并祿米倉。別建三十新廩。○四十六年題準。建本裕倉三十廩。號房五間。井一。○四十九年題準。大通橋。號房十間。歸并太平倉。改建十廩。○五十二年議準。通州中。南。大。西。三倉。增建百廩。○五十五年題準。舊

太。海運。太平等倉。增四十六廩。○五十六年題準。興平。南新等倉。增三十一廩。通倉。增二十四廩。○雍正元年議準。建萬安倉。四十二廩。官廳三間。官舍十間。科房三間。○又議準。太平倉南。增二十五廩。海運等倉。增三十九廩。通倉。增二十四廩。○二年奏準。重修石壩。號房三十間。建造土壩。號房三十間。增造通州新舊二城。號房各十有五間。○四年議準。萬安倉。照太平倉之例。增立東水門二道。○五年。奉

旨。石壩等處。增造號房五十間。○又議準。大通橋河東

號房十有六間。移建於朝陽門外。○又議準。石壩號房。見存五十間外。增建五十一間。朝陽門外。見存號房二十八間外。增建十有四間。○六年議準。增建裕豐倉。共六十三廩。官廳三間。官舍十有五間。科房六間。○又增建儲濟倉。共百有八廩。官廳三間。後廳三間。科房三間。井一。○七年奏準。北新。海運。南新。舊太。富新。興平。祿米。七倉。共建堆房三十三所。太平。萬安。二倉。共建堆房八所。交與該倉監修官。蓋造。照例保固三年。○又議準。各倉附近之處。撥給官房三間。以

為收貯文卷辦事之所。如無官房可撥。即於本倉茶果銀內。動用建造。○八年奉

旨。本裕倉圍牆下。用甄砌水道。別倉亦照此例。○乾隆

元年議準。在京各倉。積貯充盈。新糧不敷收受。祿米。裕豐。富新。三倉。並無隙地。無庸增建。南新倉。增一廩。舊太倉。增九廩。海運倉。增二十廩。北新倉。增五廩。興平倉。增一廩。太平倉。增六廩。萬安倉。增三廩。儲濟倉。增四十八廩。○二年題準。萬安倉。東水門二道。移建太平倉。○四年議準。分儲濟倉四十八廩。建萬安東倉。增建官廳三

間。科房三間。以舊萬安倉爲萬安西倉。○六年議準。京通各倉。各就廩房之多寡。地基之廣狹。酌增井。以備緩急。太平。裕豐。二倉。取水近便。毋庸掘井。祿米倉。增井五。南新。富新。北新。三倉。各增井八。舊太。興平。二倉。增井七。海運倉。增井九。儲濟。本裕。二倉。各增井二。萬安西倉。開建東水門五道。萬安東倉。掘井四。通州。西倉。增井六。中倉。增科房十間。井四。南倉。增井三。○又議準。倉中竹席板木。因積貯充實。並無空廩堆貯。應於廩座相間處。依墻下柱。上加椽瓦。後用楠板。每

倉修蓋三五處。以資收貯。計祿米。南新。舊太。海運。富新。興平。太平。東。西。萬安。儲濟。十倉。各建席板房三間。北新。裕豐。二倉。各建席板房五間。

一修葺倉廩。順治初年定。三年一小修。五年一大修。工價屬戶部。辦料屬工部。自錢糧歸并戶部。所需料價銀。并咨戶部給發。○又覆準。守倉夫役。每名。月給米六斗。每歲額修倉廩七十五間。如遇工作。每名。日給米一升。○九年題準。京通倉廩。小修。屬倉場侍郎。酌量委監督。隨時修理。於戶部支銀。如遇大修。由部確察勘估。措辦

物料。戶部給發工匠價值。○十三年題準。修理倉廩。所估應用物料工價。經管官造冊移送。巡倉御史察覈。如有取用舊材。開銷新價。及虛報浮估者。聽巡倉御史糾參。○六年議準。修造倉廩。三年內損壞者。令原修官役賠修。一年內坍塌者。原修官役賠修外。仍照例治罪。○康熙五年題準。停止倉廩歲修之例。如遇漕糧壅積。闕廩收貯。或有坍塌應修者。倉場侍郎具題。

勅部會同戶部。暨倉場侍郎。察驗確估。具題修理。○六年議準。通倉應修廩房。倉場侍郎具題。由部

會同戶部。公同驗估。動支通濟庫輕齎銀。發通惠河分司。鳩舉。○十八年題準。京倉。差工部官督修。通倉。交通惠河分司修理。仍差戶部官一人。公同估計。其通濟庫輕齎銀。截充兵餉。應用銀。於戶部支取。○二十五年

諭。聞得倉廩年久滲漏。米糧浥爛深厚。倉糧軍民所需。關係綦重。毀壞漏雨。應修廩房。倉場侍郎。親身逐一細察具題。欽此。隨遵

旨議準。動通濟庫銀。交各監督修理。嗣後倉廩倒塌。即照此例修理。造入年底冊內題銷。○三十八年

覆準。嗣後各倉廩。及號房圍牆。或有倒塌。倉場侍郎親身驗明。即令該監督等估計。動用通濟庫銀。呈報戶部。速行修理。工完。將用過銀數奏銷。○雍正二年覆準。各倉墻垣。如有滲漏坍塌之處。該監督報明倉場侍郎。即親身驗看明白。該監督果能捐修完固。俟任滿交代清楚之後。倉場侍郎覈明具題。將實在捐修銀數。造冊送部覈明。交與吏部。照例議敘。按銀數多寡。準其加級紀錄。以示獎勵。○三年奏準。京倉向用木板鋪墊。十年一換。通倉例用席片。應將京倉。展

限至十六年一換。所餘木板。鋪墊通倉。○四年覆準。各倉已開濬水溝。墊土造橋。令各監督。於每年二八月中。巡視疏濬。永為定例。不行修築者。題叅議處。并行令步軍統領。飭該地方步軍。禁止堆積壅滯。○又覆準。令倉場侍郎。驗明見在放空之廩。即將見存板木。滿鋪廩底。堅固鋪墊。如有不敷。確估報部。動支戶部庫銀。採買板木應用。嗣後放空之廩。俟各省隨糧解送本色板木到日。陸續鋪墊。○五年

諭。京通倉廩。多有屋瓦滲漏。墻垣損壞者。在京各倉。每

倉。或都統。或副都統。各一人。御史中。不論滿漢。每倉各委一人。專任稽察之責。其支放奏銷等事。不必經管。惟倉房滲漏。墻垣損壞。與倉內鋪墊。及匪類偷竊各弊。察出。即行文倉場侍郎知之。若倉場侍郎遲延。不及時辦理妥協。即據實奏聞。倘不能察出弊端。以致虧損倉糧。著落稽察之都統。副都統。御史。與倉場監督等。分賠。其通州三倉。即照此例。交與通永道。通州副將。稽察。其失察分賠之例。亦與京倉同。欽此。○十二年議準。京中各倉。每年。戶部各發銀百兩。交貯倉場侍郎衙門。凡有一切奇零修葺之處。

該監督確估。申報倉場侍郎。并稽察之都統。御史。會覈領銀。及時修補。如有違誤。稽察官據實叅奏。工竣。照例保固。造冊送部。委官覈驗。倉場衙門。仍於歲底。彙造各倉用銀清冊。送部覆覈題銷。至工程用銀在百兩以上者。應令稽察之都統。御史。會同倉場侍郎。詳細估計。專案奏明。於戶部領銀興修。工竣日。造冊送部題銷。○乾隆三年覆準。通州西。中。南。三倉。放空之殿。有應修處。所需工料銀。照在京之例。預行估計報部。如百兩以上者。題請動項。工竣造冊題銷。如不

及百兩者。就近在於通庫輕齎銀內。動支興修。工竣。據實造冊。報部察覈。仍於歲底。將準銷銀數。彙冊具題。至扣存公費銀。俟動用完工。將逐項準銷細數。開單咨部。○四年奏準。凡各倉修理工程。咨部委官估計。將清冊移送該倉。自行修葺。工完之日。該倉巡察。細加察驗。造冊復送部。委官察覈。俾承修官。於工程不敢草率。於錢糧不能浮冒。若將倉廩工程。令工部委官估計。復委官監修。及至工竣。又係工部司官察覈。其中恐有扶同侵隱之弊。應請各倉工程。照舊自

行修理。工部料估覈銷。則彼此互相稽察。均有裨益。○六年奏準。各倉廩鋪墊板木。向係十六年一換。今皆堅固整齊。毋庸復拘定例。統俟每季放空之後。察有朽壞者。用歲收板木。每廩酌量抽換。隨時修理。○八年奏準。各倉廩抽換板片。例應由部委官。察驗覈銷。每因新糧到通。需廩貯米。不及候驗。嗣後抽換廩板。如在新糧未到。糧務完竣之日。仍照舊例辦理。倘遇新糧到通之時。由倉場侍郎委官。就近察驗。咨部覈銷。

○十八年

諭嗣後各倉遇有應修工程著工部倉場該旗各委
官一人會同料估修理欽此○又奏準通州西中
南三倉收貯漕白米糧支放俸糈每年額貯至
多不過四五十萬石不等計各倉廩貯米之外
見空者二百二十六廩酌量情形西中二倉足
敷收貯南倉八十一廩似可不設再雍正年間
京師增建東西萬安裕豐儲濟等四倉漕糧運
京者多通倉貯米只有此數因之空廩日增而
滲漏傾頽亦所時有定例廩房應修無論有無
需用該監督例應呈報察覈興修工竣仍多閒

置虛糜帑金請俟南倉米糧放完之後即將該
倉裁汰其額貯數目歸并西中二倉照常收貯
無庸再為設立見在報修之廩即行停止

一直省倉廩順治十三年議準積穀振濟務令
修葺倉廩○康熙二十四年議準喜峯口張家
口下堡城殺虎口殺虎堡城內各蓋倉房五間
○二十五年題準墨爾根地方起造倉廩收貯
米穀○二十六年題準古北口蓋造倉房十有
五間○三十一年覆準古北口外坡賴村建造
倉房十有五間○三十二年題準湖灘河朔建

造倉房百五十四間。○三十五年題準。湖灘河朔。建造倉房五十間。○雍正四年

諭。凡倉穀霉爛。皆由於倉廩不修之故。平日地方官。所司何事。以致倒塌滲漏。虧折米糧。愈當加懲者。今若寬其處分。則有司於倉廩。平日必不加意修理。以便措辭。著九卿議奏。欽此。隨遵。

旨議準。凡該地方倉廩無多。將倉糧寄貯僧道寺院者。或有露囤者。該地方官。即行具詳。該督撫。確勘具題。倘州縣官。因循怠玩。不將倉廩葺補修治。又不詳請建造。以致米穀霉爛。應照溺職例。革

職。倉廩既經修理。猶有託名霉爛虧空者。照侵蝕例治罪。○十一年議準。喜峯口倉。就近歸於遷安縣。經營。每間貯穀五百四十石。應建倉廩二十六間。○乾隆四年議準。直省興建倉廩。準在存公銀內動給。每間貯米五百石。需工料銀二十兩。○十八年奏準。積貯為本計所關。而推行惟義倉尤便。蓋鄉村分貯。領散可以隨時。典守在民。吏胥無由滋弊。直隸密邇畿輔。緩急尤宜預備。於四鄉酌設倉廩。自三四區。以至十有八區。擇人煙稠密。形勢高阜之處。使四面村莊

爲附麗。近在十五里內者。三十三縣。在二十里內者。七十三州縣。在二十里及二十餘里者。三十三州縣。在三十里內者。三州縣。在四十里內者。二縣。督諸有司。隨宜勸導。俾各出有餘。不限粟麥。悉從其便。見據報新舊義穀。二十八萬五千三百餘石。將各州縣衛大小村莊。並各村到倉里數。悉載於圖。統計爲圖百四十有四。合百四十四州縣衛。共村莊三萬五千二百有十。倉一千有五。使各州縣衛。按圖計倉。知各村之孰遠孰近。按倉稽穀。知四境之或絀或盈。凡於境

內振糶惠民之舉。一目了然。亦足以資措理。

